

70- Al-Qur'an mengandungi asas-asas ugama (أصول الدين), baik dari segi dalil-dalil mahupun dari segi persoalan-persoalannya. Adapun dalam bab hukum-hakam, maka kebanyakan keterangannya adalah bersifat kulli (menyeluruh) bukan juz'i (terperinci).

الْقُرْآنُ مُشْتَمِلٌ عَلَى أَصُولِ الدِّينِ
دَلَالِيهِ وَمَسَائِلِهِ، أَمَّا تَعْرِيفُهُ لِلْأَحْكَامِ
فَأَكْفَرُهُ كُلِّيًّا لَا جُزْئِيًّا.

قاعدة ٧٠

Keterangan:

Al-Qur'an memang mengandungi keterangan yang lengkap tentang prinsip-prinsip agama (أصول الدين) dan asas-asas hukum secara menyeluruh. Jalan-jalan untuk sampai kepadanya juga dijelaskan. Apa yang dimaksudkan dengan prinsip-prinsip agama (أصول الدين) itu ialah persoalan-soalan aqidah yang pasti dan putus.

Berhubung dengan persoalan-persoalan hukum-hakam pula al-Qur'an hanya memperkatakan tentangnya secara umum dan menyeluruh sahaja. Al-Qur'an tidak membincangkannya secara terperinci. Segala syarat, rukun, adab, halangan dan apa-apa yang membatalkan sesuatu ibadat sebagai contohnya tidak dinyatakan secara tuntas.

~~Urusan memperincikannya dan mengemukakannya dalam bentuk contoh diserahkan kepada~~ Rasulullah s.a.w. Hadits-hadits Bagindalah yang bertindak sebagai pentafsir dan penjelas kepada apa-apa hukum yang tersebut di dalam al-Qur'an secara umum itu. Jika tidak terdapat hadits mengenainya, maka pendapat-pendapat Salaf menjadi rujukan. Jika pendapat mereka pun tidak ada, maka penyelesaian masalah dilakukan dengan berpandukan qaedah bahasa `Arab.

Pendek kata al-Qur'an itu walaupun ringkas yang kita semua ketahui, namun ia adalah sebuah

kitab yang lengkap mengandungi prinsip-prinsip agama Islam dan asas-asas hukum sebagai panduan hidup manusia.

Di bawah ini adalah beberapa contoh pengaplikasian qaedah ke-70 yang tersebut di atas:

(1) Yang berkaitan dengan prinsip-prinsip agama Islam (`aqidah) atau Ushuluddin:

اللَّهُ لَا إِلَهَ إِلَّا هُوَ الْحَيُّ الْقَيُّومُ لَا تَأْخُذُهُ سِنَّةٌ وَلَا نَوْمٌ لَهُ مَا فِي السَّمَوَاتِ وَمَا فِي الْأَرْضِ مَنْ ذَا الَّذِي يَشْفَعُ عِنْدَهُ إِلَّا بِإِذْنِهِ يَعْلَمُ مَا بَيْنَ أَيْدِيهِمْ وَمَا خَلْفَهُمْ وَلَا يُحِيطُونَ بِشَيْءٍ مِنْ عِلْمِهِ إِلَّا بِمَا شَاءَ وَسِعَ كُرْسِيُّهُ السَّمَوَاتِ وَالْأَرْضَ وَلَا يَئُودُهُ حِفْظُهُمَا وَهُوَ الْعَلِيُّ الْعَظِيمُ

﴿٢٥٥﴾

Bermaksud: Allah, tiada Tuhan (yang berhak disembah) melainkan Dia, Yang Tetap hidup, Yang Kekal selama-lamanya mentadbirkan (sekalian makhlukNya). Yang tidak mengantuk usahkan tidur. Yang memiliki segala yang ada di langit dan yang ada di bumi. Tiada sesiapa yang dapat memberi syafaat (pertolongan) di sisiNya melainkan dengan izinNya. Yang mengetahui apa yang ada di hadapan mereka dan apa yang ada di belakang mereka, sedang mereka tidak mengetahui sesuatu pun dari (kandungan) ilmu Allah melainkan apa yang Allah kehendaki (memberitahu kepadanya). Luasnya Kursi Allah meliputi langit dan bumi; dan tiadalah menjadi keberatan kepada Allah menjaga serta memelihara keduanya. Dan Dialah Yang Maha Tinggi, lagi Maha Agung. (al-Baqarah:255).

Ayat al-Kursi ini mengandungi prinsip-prinsip `aqidah Islam tentang ketuhanan Allah. Di dalamnya terdapat perincian tentang sifat-sifat Allah.

(2) Yang berkaitan dengan hukum-hakam dan cabang-cabang agama:

وَأَقِيمُوا الصَّلَاةَ وَآتُوا الزَّكَاةَ وَأَرْكَعُوا مَعَ الرَّاكِعِينَ ﴿٤٣﴾

Bermaksud: Dan kerjakanlah sembahyang, tunaikanlah zakat dan ruku`lah kamu bersama orang-orang yang ruku`. (al-Baqarah:43).

Firman Allah ini memerintahkan orang-orang yang beriman supaya mengerjakan sembahyang dan menunaikan zakat sebagai suatu kewajipan secara umum, tanpa menyebutkan segala perincian mengenainya berupa syarat, rukun dan lain-lain.

(3) Firman Allah di bawah ini juga termasuk dalam bab hukum-hakam yang disebutkan secara umum tanpa perincian:

وَالسَّارِقُ وَالسَّارِقَةُ فَاقْطَعُوا أَيْدِيَهُمَا جِزَاءً بِمَا كَسَبَا نَكَالًا مِّنَ اللَّهِ وَاللَّهُ عَزِيزٌ حَكِيمٌ ﴿٣٨﴾

Bermaksud: Laki-laki yang mencuri dan perempuan yang mencuri, potonglah tangan mereka sebagai balasan bagi apa yang mereka kerjakan, (juga sebagai) suatu hukuman pencegah dari Allah. Dan (ingatlah) Allah Maha Kuasa, lagi Maha Bijaksana. (al-Mā'idah:38). / 2/13/23